



SIARAN MEDIA
KPWKM SEDIAKAN GARIS PANDUAN PENGENDALIAN KES KEGANASAN
RUMAH TANGGA

PUTRAJAYA, 1 OKTOBER – Buku Garis Panduan Pengendalian Kes Rumah Tangga telah disediakan oleh Kementerian Pembangunan Wanita, Keluarga dan Masyarakat (KPWKM) kepada 9 buah agensi teknikal bersempena pelancaran Kempen 90 Hari Menangani Keganasan Terhadap Wanita 2015 di Dewan Auditorium Cempaka Sari, Perbadanan Putrajaya, hari ini. Majlis pelancaran tersebut telah disempurnakan oleh Menteri Pembangunan Wanita, Keluarga dan Masyarakat, Dato' Sri Rohani Abdul Karim.

Buku tersebut disediakan bagi membolehkan semua maklumat mengenai peranan dan tanggungjawab serta prosedur yang diguna pakai oleh agensi terlibat didokumenkan sebagai sumber rujukan. Garis panduan ini juga bertujuan untuk mengelakkan pertindihan tugas dan fungsi antara satu agensi dengan agensi lain yang terlibat dalam pengendalian kes keganasan rumah tangga.

Dato' Sri Rohani berkata, "Kementerian berharap simbolik penyerahan dokumen Garis Panduan Pengendalian Kes Keganasan Rumah Tangga pada hari ini akan menjadi titik tolak kepada kerjasama strategik kita semua dalam mengendalikan kes keganasan rumah tangga". Tambah beliau, ini adalah permulaan kempen 90 hari Menangani Keganasan Terhadap Wanita sempena sambutan Hari Antarabangsa Menangani Keganasan Terhadap Wanita pada 25 November nanti.

"Kempen 90 hari Menangani Keganasan Terhadap Wanita yang dilancarkan pada hari ini hanyalah **satu daripada banyak inisiatif yang dilaksanakan** bagi memastikan

wanita dapat hidup dalam persekitaran selamat, bebas dari sebarang bentuk penderaan, penganiayaan dan keganasan,” katanya kepada pemberita ketika merasmikan pelancaran tersebut.

Rohani juga memaklumkan kaum wanita juga boleh menggunakan kemudahan perkhidmatan Talian Kasih 15999 yang beroperasi selama 24 jam sehari bagi membuat aduan mengenai kes-kes krisis yang berlaku dalam masyarakat seperti penderaan, pembuangan bayi, kaunseling dan lain-lain.

Hadir sama YBrs. En. Azman Mohd Yusof, Timbalan Ketua Setiausaha Strategik (S), KPWK, YBrs. Encik Wee Beng Ee, Timbalan Ketua Setiausaha Operasi (O), KPWK, YBhg. Dato’ Munirah Binti Abdullah Bajanuddin, Ketua Pengarah Jabatan Pembangunan Wanita. YBhg. Datuk Mahiran Md Isa, Setiausaha Presiden Perbadanan Putrajaya

Disediakan oleh:
Unit Komunikasi Korporat
Kementerian Pembangunan Wanita, Keluarga dan Masyarakat
Aras 35, Persiaran Perdana
PUTRAJAYA
Tel: 03-8323 1088 E-mel: info@kpwkm.gov.my